



Şerîf Hejarî.

**Hin ji hêzên kurdî, bûne ko-  
palê destê Îranê û fermanên  
wê cîbicî dikin.**

»»» R:5



**Xelkê Îranê  
çima nerazî ne?**

»»» R:4



**N: Mistefa Hicrî**

**M**eş û rabûna xelkê Îranê li dijî rejîmê di meha Befranbara sala borî de, bi awayekî giştî gihîşte nêzî sed bajar. Aliyê herî kêr yê xisara vê rabûnê bo xelkê Îranê, destbiserkirin û girtina bi hezaran kesî û kuştina 25 kesan (li gora gotina berpîrsên rejîmê) di encama serkutkirina xelkê meşvan ji aliyê hêzên serkutker ên Komara Îslamî a Îranê ve, û kuştina pênc kesên girtî li jêr îşkenceya di girtîgehê de bûye.

Lê nirxa van meşên xelkî bo rejîmê di biyavê siyasî, çandî, û civakî di navxwe û derve de girantir ji vê bû ku bê cu-brankirin. Armanca vê nivîsê baskirina

ji çawanî û nirxandina van xisaran nîne, jiber ku eva behseke dirêj, û gotarên din dixwaze, lê armanca nivîs-karê vê nivîsê baskirina ji bersivandina vê pîrsê ye ku “Xelkê Îranê çima nerazî ne?”.

*Bidestveanîna mafên netewî yên gelê kurd  
di çarçoveya Îraneke demokratîk û federal de*

# Agirî

*Duheftînameyek Siyasî-Giştî Ye, PDK Îranê diweşîne [www.kurdistanmedia.com/kurdî](http://www.kurdistanmedia.com/kurdî)  
[www.agirimedia.org](http://www.agirimedia.org) Hejmar (324) 20-04-2018 Buha (1000) Tûmen*

## Rasana aram ya bajar

**J**i roja Yekşemî 26'ê Xakelêweyê şûnda bazariyên bajarên sînorî ên Kurdistanê, wate Bane û Ciwanroyê, bona nîşandana nerazîbûna xwe li hemberî daxistina bazarçeyên sînorî û zêdekirina nirxa gumrikan ku wekî çalakên siyasî dibêjin, pêk tê jî siyaseta qirkirina gelê Kurd li Rojhilata Kurdistanê, dest dane girevê, û di heyama çend rojan de, ew girevgirtin berfireh bûn, û heft bajarên Kurdistanê bi xwe ve girtin. Li piraniya van girevan de, bi awayê simbolîk û wekî gazindeya li hember siyaseta qirkirina xelkê hejar di Kurdistanê de, girevgirtiyan sifreya betall raxistin, û ragehandin: “Sifreya betall ya me nan dixwaze”.

Eva çend meh in ku bi biryareke rejîmê, sînorên kolberiyê ên di navbera Başûr û Rojhilata Kurdistanê ku çavkaniya bijîwa sedan hezar kasibkar û dukandar û kolberên bajarên sînorî ye, hatin daxistin, û ew yek jî bûye sedema bêkariya zêdetir ya xelkê.

Heya dariştina vê nûçeyê, gireva kasibkarên heft bajarên Rojhilata Kurdistanê wate Ciwanro, Bane, Merîwan, Seqiz, Serdeşt, Pîranşar û Mehabadê berdeyam e.

Êvariya roja Çarşemiyê 29'ê Xakelêweyê Se'îd Celilî nûnerê rejîmê li şevra Bilind ya Ewlehiya Neteweyî, bona



bidawîanîna gireva dukandar û bazariyan, serdana bajarên girevgirtî kir, û di dema axavtina xwe di bajarê Bane de, bi sedema nerazînişandana girevgirtiyan, nekarî axavtina xwe bi dawî bîne.

Her di vê derheqê de fermanarê bajarê Bane, qewl û soza cîbicîkirina kêşeyên bazariyan dabû, lê xelkê bawerî bi qewlên navbirî nekirin.

Her di vê derheqê de Nav-

enda Hevkariya Hizbên Kurdistanê Îranê jî daxuyaniyek weşand ku di beşeke wê daxuyaniyê de hatibû:

“Em piştewaniyê ji girevgirtin û nerazînişandana bajarên sînorî dikin.

Eva çend roj in ku girevgirtin û nerazîbûna xelkê bajarên sînorî ên Kurdistanê li dijî daxistina sînoran, dirêjî heye. Ew nerazînişandanên medenî bi awayê kombûna li ber

deriyê femandariyên bajarên Ciwanro, Bane, Merîwan, û Seqizê, û herwisa bi awayê raxistina sifreya betall û kombûna li dewra vê sifreyê xwe nîşan daye. Vê hereketa medenî bajarên Serdeşt û Pîranşarê jî bi xwe ve girtiye, û tê çaverêkirin ku veguhêze bajarên din jî, û herwisa dom hebe.

Eşkere ye ku jiyana hejmareke zaf ji rûniştîyên zehmetkêş ên bajar û

navçeyên sînorî ji riya kolberiyê ve bi rê ve diçe. Rejîma Îslamiya Îranê li jêr navê xebata li dijî hatina alavên qaçax de, sal bi salê tundûtîjî û tawan û zordarî li dijî kolberan zêdetir kirine. Serbarê kuştin û birîndarkirina bi sedan kolberî û dets-biserdegirtina barên wan, û jinavbirina çarpiyên ku bar tînin û dibin, berdeyam hewla tunekirina vê tenê çavkaniya jiyana dahata bi dehan hezar malbatên desteng ên van navçeyan daye”.

Herwisa di beşeke din de hatiye:

“Niha jî tevî daxistina ser ji

»»» R:8

**Sergotar**

Nan, Azadî,  
Kerameta mirovî

N: Kerîm Perwîzî

Mirovek ku di hejariyê de hatiye ragirtin, mirovek ku haşayê ji nasnameya etnikî, ayînî, yan neteweyî ya wî/wê tê kirin, yan dikeve ber zexta siyaseta helandin û sivi-katîpêkirin, yan li jêr stema zayendî de dijî, mirovek e ku kerameta wî/ê jê hatiye zewtkirin.

Eva hevokek e nava bername û pêreva navxwe ya PDKÎ ye, ku li beşa bingehên hizrî û siyasî ên hizbê de hatiye, û di van rojan de, bi rohnî em rengvedana kiryareke weha ya dijîmirovî di Komara Îslamî de dibînin.

Rejîma Îslamî li Tehranê, li ser bingeha sivikatiya bi mirov hatiye avakirin, û di çarçoveya îdeolojîk ya qorixxwazane de siyaseta kiriyê, û kiryar ji xwe nîşan daye, ku mirov di hizra wê de jîndareke bêhêz û bêawez û bêvîn e, ku hewce ye wekî ajel heya ku dikare mifahê jê wergire, û her wekî ajel her demekê bêxerî kir, bide ber qamçiyên. Ji vê dîtingeha dijîmirovî ya Komara Îslamî ve, her çî ji navenda îdeolojîk ya deshîlata tîkel bi şovînzîmê dûrtir dike, ajeltir têy ber çav.

Tenê mirov ji vê dîtingehê ve Weliyê Feqîh e, û ewên ku hinek ji Weliyê Feqîh nêzik in, rengê mirovan didin! Xeyrî fars, hejar, kêmdahat, jin, xeyrî Şî`eyê wilayeta feqîhî, ji dîtingeha Weliyê Feqîh ve zêdetir wekî nemirovan çav lê tê kirin.

Çar dehikan deshîlata Komara Îslamî teji bûye ji sivikatiya bi neteweyên xeyrî Fars, û teji bûye ji çewsandina mirov bi destê mirov, teji bûye ji dizî û talankirina serwet û samana welat, û baca terorîzmê û serberedayiyên wan jî, sifreya nanê hişk ê çîna kêmdahat û hejar bûye, û seranên rejîmê li Kanada û Swîsê û Birîtanya û Îspaniya û Alman vîla û pişka hotêlan kirîne.

Stema li dijî jinan, li dijî cudabîran, li dijî neteweyên xeyrî fars, li dijî

**Şandeke Komela Zehmetkêşan a Kurdistanê, serdana PDKÎ kir****Şandeke Komela Zehmetkêşan a Kurdistanê, bi serperestiya "Riza Ke`ibî" serdana PDKÎ kir.**

Roja Yekşemî 28`ê Xakelêweyê, şandeke Komela Zehmetkêşan a Kurdistanê, bi serperestiya "Riza Ke`ibî" cihgirê sekreterê giştî yê Komela Zehmetkêşan a Kurdistanê, serdanî PDKÎ kir, û ji aliyê heyeteke PDKÎ bi serperestiya "Mistefa Hicrî", lêpirsyarê giştî yê PDKÎ û hejmarek ji endamên rêberiyê ve pêşwazî jê hate

kirin.

Di destpêkê de, "Riza Ke`ibî" tevî pîrozbahîgotin ji ber tewawbûna kongireya 16`mîn a PDKÎ ya naskirî bi "Kongireya Rasana Rojhilat" û hilbijartina lêpirsyarê giştî yê hizbê, herwisa hewcehiya zêdetir li yek nêzîkbûna partiyên siyasî yê Kurdistanê girîng da zanîn.

Piştê "Mistefa Hicrî" tevî spas ji ber

pîrozbahî gotina navbirî, herwisa derheqê bihêztirkirina Navenda Hevkariyê, û yekbûn û yekdengiya hêzên siyasî yê Rojhilat û rewşa nebaş a rejîmê, herwisa dîtingeha PDKÎ jî anî ber bas.

Her di vê civînê de, derheqê rewşa Kurd di parçên din yê Kurdistan de, û herwisa pirsgerêkên pêşiya doza Kurd, guherîna bîr û boçûnan kirin, û herwisa hewcehiya wan civînan û hevdîtinan girîng dane zanîn.



ayînen xeyrî şî`e ên Wilayeta Feqîhî, û li dijî hemû mirovekê ku xwe pê

xwedî nasname û kesayetiyeke bûbe, di heyama vê deshîlata dîniya pîr tawane de bi rê ve çûye.

Encama vê deshîlatê sivikatiya bi kerameta hemû mirovan di panahiya erdnîgariya welateke bellalêdayî bi navê Îranê de bûye, û ew rejîm bi perê neftê û bazerganiya digel bazerganên xwînê li Ewropa, Kanada, Amerîka, Rûsiye, çîn, û...hwd nirxa hêza hov ya Spaha Pasdaran dabîn dike, û xelkê pê serkut dike.

Di sistemeke weha de ye ku xelk li Qum û Îsfahanê dirêjin ser şeqaman û wênayên Xamineyî dişewitînin! Di Tehranê de jî derwêş digel deshîlata Xamineyî berbirû dibin, û jinên mandî ji hemû stemekê, xavika (leçka) stemkariyê ji serê xwe radikin, û pêpikên deshîlata Wilayeta Feqîhî pê dihejînin.

Her di encama sistemeke weha de ye, ku bajarên wekî Bane û Cîwanro û Serdeşt û Pîranşar ku heya duh wekî cemsara bazerganiyê dihatin binavkirin, niha bi sedan kesî tînin ser kolanan û sifreya betall ya mala xwe nîşan didin.

Rejîmek û sistemek ku sivikatiyê bi kerameta mirovan dike, îca çî bi ragirtina di hejariyê de, yan jî bi haşakirina ji nasnameya neteweyî ya wan, yan stema zayendî û ayînî, sistemek nine ku bikare xweşî û jiyana rehet ji xelkê re bi diyarî bîne, û hemû ewên ku kerameta wa sivikatiya pê hatiye kirin, dijî wê radibin serpiyan, û koşka rizî ya dehîlata wehmî ya wê dişewitînin.

## Şandeke Partiya Azadî a Kurdistanê serdana PDKÎ kir

**Şandeke Partiya Azadî a Kurdistanê, bi serperestiya “Mistefa Ozçelik” serdana PDKÎ kir.**

Roja Yekşemî 28'ê Xakelêweyê, şandeke Partiya Azadî a Kurdistanê, bi serperestiya “Mistefa Ozçelik”, serokê giştî yê vê partiye serdana PDKÎ kir, û ji aliyê heyetê PDKÎ bi serperestiya “Mistefa Hicrî”, lêpirsyarê giştî yê PDKÎ, û hejmarek ji endamên rêberiyê ve pêşwazî ji wan hate kirin.

Di destpêkê de, “Ozçelik”, tevî pîrozbahîgotinê jiber tewawbûna kongireya 16.mîn a PDKÎ û hilbijartina lêpirsyarê giştî yê hizbê, weke hemî deman derheqê berfirekîna pêwendiyên dîrokî û dostane yên di navbera wan û PDKÎ de pêdagîrî kir, û herwisa bandor û rola PDKÎ di Kurdistanê de bilind nixand.



Piştê “Mistefa Hicrî”, tevî spaskirin jibar pîrozbahîgotina navbirî, derheqê rewşa nebaş a rejîmê di warê giranî, betalî, kêmbûna buhaya Tûmen, nerazîbûnên xelkê, xemsariya rejîmê, siyasetên destêverdanên rejîmê di deverê de, û tevdanîkariyên ve rejîmê û herwisa dîtingeha PDKÎ axivî.

Her di vê civînê de, derheqê rewşa Kurd di Bakûrê Kurdistanê, û herwisa parçên din yên Kurdistan de, û herwisa astengî û pîrgîrêkên din yên pêşiya doza Kurd de guherînên bîr û boçûnan kirin.

## Desteyek din ji pêşmergeyan kincê pîroz ê pêşmergeyê li xwe kirin

**Desteyek ji keç û xurtên şoreşger yên Kurdistan a Rojhilat, piştî derbazkirina devra destpêkî a pêşmerge di çiyayên Kurdistanê de, kincên pîroz yên pêşmerge lixwe kirin.**

Nûçegihanê malpera “Kurdistanmedia”yê, di çiyayê Kurdistan de ragehand ku: Roja Pêncşemî 23'ê Xakelêweya 1397'an, devra 229 ya destpêkî a pêşmerge di çiyayên Kurdistan de bi rê ve çû, û di vê rêûresma taybet de, desteyek ji ciwanên şoreşger û lêhatî yên Kurdistan a Rojhilat tevî rêzên hêzên pêşmerge bûn, û çeka beravîkirin ji ax û şerefa xwe li milê xwe kirin.

Ev rêûresma bi xwendina sirûda neteweyî a “Ey Reqîb”, û ragirtina deqeyek bédengî ji bo rêzgirtin ji riha pak a şehîdên Kurdistan destpêkir. Piştê Seyîd Ezîz Nîkcûyan” yek ji fermanderên leşkerî yên PDKÎ, bi boneya dawî hatina devra destpêkî a 229 ya pêşmerge axvî.

Nîkcûyan di axavtina xwe de, bas ji vê kir ku, Di qata têkoşîn û xebatê de, hewceye hemû hevber an û hevçeper, bi rengekî dilsozane piştevanê yektir bin ji bo pêgehandin û haydar kirina yektir, û herwisa hevlibidin da ku rojbiroj îrade û îmana pêşmerge û endamên hizbê ji bo dirêje dan bi xebatê qahîmtir bikin.



Di beşek din a vê rêûresmê de, helbestek li jêr navê “Şengesevar”, ji aliyê mamosta “Şerîf Felah” ve hate xwend in.

Di beşeke din de, rapora perwerdkirina devrê ji aliyê “Hîwa Mîrzayî” yek ji mamostayên perwerdê ve hate xwend in, û herwisa kar û çalakiyên devrê ji kesên beşdar re hate xwendin.

Di nav bernamê de, sirûda bi navê “Gel xebatê dikin” ji aliyê kesên beşdarên ve devrê hate xwend in.

Herwisa di beşeke din a vê rêûresmê de, peyama devra 229 ya destpêkî ya pêşmerge, ji aliyê yek ji pêşmergeyên beşdar ên ve devrê yê bi navê “Kurdyar Kerîmî” ve hate xwend in.

Herwisa di dawîya vê rêûresmê de, helbesta ku “Dr.Awat Saroc” çêkirinbû, ji aliyê “Ferîd Îslamî” ve hate xwend in.

Piştê du stranên şorevanî ji aliyê beşdarên devrê ve pêşkêşî beşdaran hate kirin.

Herwisa ev rêûresm bi nimayêşên taybet ên nizamî ku ji aliyê kesên beşdar yên di vê devrê ve hatibû amade kirin dawî pê hat.

## Xelkê Îranê çima nerazî ne?



### N: Mistefa Hicrî

Meş û rabûna xelkê Îranê li dijî rejîmê di meha Befranbara sala borî de, bi awayekî giştî gihîşte nêzî sed bajaran. Aliyê herî kêr yê xisara vê rabûnê bo xelkê Îranê, destbiserkirin û girtina bi hezaran kesî û kuştina 25 kesan (li gora gotina berpirsên rejîmê) di encama serkutkirina xelkê meşvan ji aliyê hêzên serkutker ên Komara Îslamî a Îranê ve, û kuştina pênc kesên girtî li jêr îşkenceya di girtîgehên de bûye.

Lê nirxa van meşên xelkî bo rejîmê di biyavê siyasî, çandî, û civakî di navxwe û derve de girantir ji vê bû ku bê cubrankirin. Armanca vê nivîsê baskirina ji çawanî û nixandina van xisaran nine, jiber ku eva behseke dirêj, û gotarên din dixwaze, lê armanca nivîskarê vê nivîsê baskirina ji bersivandina vê pirsê ye ku “Xelkê Îranê çima nerazî ne?”.

Bersivandina rast ya vê pirsê di vî warî de girîng e, ku seranên rejîmê û kirêgirtiyên rengbireng ên wan, bizanebûn û bi armanca kêmnirx nîşandana vê rabûnê, herwekî derbazbûyî hewl dane ku bîrûraya giştî bixapînin, û girûpeke din jî nebizanebûn û li jêr bandora pêla berfireh ya piropagandeyên rejîmê ku ji rîya hezaran tirîbonên mizgevtan,

kanalên televîzyonî, radyo, rojname û navendên fikrî û teblîxî ên rejîmê ku bombebarana hizrî ya xelkê dikin, bi awayekî din di rastaya armancên rejîmê pêngavan hildigrin, eva di demekê de ye ku tu ragehandineke azad û serbixwe di vî welatî de tune ye, ku di hemberî van pêlên bihêz de, xelkê digel bersiva rastîn ya vê pirsê nasyar bike.

Rejîmê hemû şiyana maşîna piropagandeya xwe bi kar anîye, da ku bikarin pîrsa rabûna giştî ya xelkê nerazî di meha Befranbarê de, ku heta niha di formên curbicur de (Gireva kedkaran, karsazan û bi taybetî meşa xelkê Ereb ê Ehwezê) dom hebûye, di biyavê aborî de berteng bike, û bi vî rengî biyavên din ên sedemên nerazîbûnan ku giştîgirtir ji biyavê aborî ne, veşêrin.

Ew rejîm her ji rojên destpêka hatina bo ser deshilatê hemû hewla xwe da, ku ji Îranê dojehekê bo xelkê xwe çê bike, ku birjêkirina wê jî zehmet bû, û elheq hewl û bernameyên wê jî di doma çil salên borî de, di biyavê guherîna Îranê bi cehnemê tewaw serkevtî bûye. Yek ji bernameyan wêrankirina aboriya Îranê bû. Darê-tina bi hûrî ya siyasatên navxweyî û hevahengkirina siyasatên derveyî ji bo çêkirina dijminan û mezaxtina dahatên berfireh ên welat di rastaya sergirtina îdeolojiya pozbilindane (bilindfirane) ya zêdexwaziyên xwe, bona gihîştina bi rêberatiya cihana

Îslamê cuda ji gendeliya hevsarberedayî ya hikûmetî karî ku xelkê ji nanê ser sivka xwe jî bêpar bike. Rejîm di pêşvebirina vê siyaseta aborî de li pey vê armancê bû ku nanê xelkê jî di nava lepên xwe de hebe, da ku bi vî rengî hemû ewên ku digel siyasatên rejîmê nînin bitirsîne, û gefa qutkirina nanê wan bixwe, û ji vê riyê ve hêza xwe ya serkutker di navxwe û hêzên dagîrker û destêwerder di derveyî welat de li jêr navên wekî Spaha Pasdaran, besîc, û ...hwd roj bi rojê berfirehtir bike, jiber ku di “Umulqera ya Îslamî” ya Îranê de, ew tex ne tenê destên wan nagihîje devên wan, belku di talankirina malên giştî, gendelî, û rantxwariyê de serbest û azad hêlane. Ew aboriya wêran ku rejîm wê wekî aboriya Îslamî! bi nav dike, tenê beşek ji kêşeya xelkê Îranê ye, ku rojane digel wê de serûkar hene, û her rojê bi aloziya wê ve zêde dibe. Ji bilî kêşeya aborî, vê rejîmê bi hezaran kêşeyên din jî bo xelkê afirandiye, ku her yek ji wan kêmnirxir ji kêşeya aborî jî bo wan nînin, bi awayekî ku bingeha civaka Îranê tevlihev kirine.

Kêşeyeke din berfirehkirina îtiyadê wekî xisareke civakî ye. Pûşpera sala 1396'an Perwîz Efqar berdevkê Navenda Xebata li dijî madeyên muxedir, hejmara mu'itadên ku berdevam madeyên muxedir bi kar tînin di Îranê de, 2 milyon û 808 hezar kes ragehand.

Li gora lêkolînên Wezaretê Tendirustiyê ku encama wê di roja 19.10.1396'an de hate ragehandin, nêzî %24 ji xelkê Îranê rastî kêşeyên derûnî hatine. Nûçegihaniya “IRNA”yê ji zimanê cihgirê Wezîrê Tendirustiyê ve ragehandiye ku 6 milyon û 300 hezar kes tûşî nexweşiya xemokiyê bûne, û lêkolînên vê wezaretxaneyê bas ji vê dikin ku %6.23 ji Îraniyan tûşî kêşeyên derûnî ne, û li ser hev %7.12 ji nifûsa 15-63 salî di Îranê de rastî xemokiyê hatine.

Lêkolînên zanîngeha “Îlûmê pîzişkî” ya Tehranê di salên 1378-1387'an nîşan dide ku asta belavbûna kêşeyên derûnî di nava xelkê Îranê di navbera van neh salan de %60 zêde kiriye, û gihaye zêdetir ji %34.

Hevdem digel berfirehbûna kêşeyên civakî di Îranê de, gendeliya dezgehên, û navendên hikûmetî û berpirsên asta bilind ya welat jî herikîneke ber bi jor hebûne. Ehmed Tewekulî

nûnerê meclisa Şevra Îslamî ku serdemekê serokatiya navenda lêkolînên meclisê li stû bû, bas ji gihîştina Komara Îslamî bi “qonaxa gendeliya sistematîk” kiriye, û pêdagirî kiriye, ku “Navendên berpirsyar di warê xebata li dijî gendeliyê bixwe tûşî gendeliyê bûne”. Navenda navneteweyî ya zelaliya aborî jî tevî lêkolîna derbarê 177 welatan di sala borî de, Komara Îslamî di warê gendeliya aborî û îdarî de xistiye nava pileya 144'an de.

Bi heman awayî em dikarin hejmareke din jî bi rêzbanda bêserûberîyan û kêşeyên xelkê Îranê ve zêde bikin, ku encama siyasat û bernmayên navxweyî û derveyî ên rejîma Îranê bûne, û encama wê jî bo xelkê weha bûye:

1-Vegeşîna bilez ya serjimêriya xwekujiyê: Nûçeya “online” ya roja 28'ê Xezelwera 1396'an nivîsand: Xwekujî di Îranê de bi awayekî cihê heyrîmanê di halê zêdebûnê de ye. Dosiye hewldan bo xwekuştinê ji sala 1390-94'an (Di pênc salan) de, zêdebûna %66 di nava jinan, û %71 di nava mêran de hebûye. Niha Îranê pileya yekem di xweşevitandina jinan di Rojhilata Navîn de heye (Weşana Cehanê Sen'et 14.03.1396).

2-Nemana kêfxweşiyê di nava xelkê de, û guherîna wê bo civakeke tundûtîj. Saziya pîzişkê yasayî di Befranbara 1395'an ragehand ku di heşt mehên yekem yê vê salê de zêdetir ji 400 hezar birîndaran serdana vê saziyê kirine, ku hemû jî bi sedema şer û pevçûna bi hev re bûye.

Ew yek heman doje (cehnem) e, ku rejîma Îranê bo xelkê xwe pêk anîye, niha ew xelk piştî çend dehkên berdevam rêçareya rizgariya xwe ji vê cehnemê bi dirustî di sermîxûniya rejîmê de dibînin.

Ku wisa bû sedema nerazîbûna xelkê ji vê rejîmê xwediyê gellek biyavên wekî nebûna azadî, serkut û zexta zêde ya li dijî kêmaniyên olî û mesebî, serkut û şikandina neteweyên xeyrîfars, û talana çavkaniyên avî û bin'erd ên herêmên derdora Îranê, û stemên bêqas ên din li dijî xelkê Îranê ye, û kêşeya aborî tenê biyaveke wê ye ku rejîm dixwaze da ku bi mezin nîşandana wê, aliyên din ên nerazîbûna bipeçêve, lê nikarin bo heta heta xelkê bixapîne.

## Hevpeyvînek digel Şerîf Hejarî derheq pirsên girîng ên rojevê



Şerîf Hejarî mamostayê zanîngehê

**Guhertinên nav kabîneya Donald Tramp û bandora wê li ser hevkeşeyên siyasî û bûyeran, mijara gotûbêjekê ye digel birêz Şerîf Hejarî, Mamostayê Zanîngeha Silêmaniyê ku bala we bo beşek ji wê radikişînin:**

**H: Selîm Zencîrî**

**Pirs: Ew guherînkariyên di kabîneya Tramp de dikare çi guherînekê di siyaseta derve ya Amerîkayê derheq Rojhilata Navîn li pey xwe bîne?**

**Bersiv:** Min jêve ye ku ew guherînkariyê bo armanckê ye ku Trump bixwe bawerî pê heye, û di dema piropagandeya hîlbijartinan de soz daye gelê Amerîkayê ku ji bo bidestxistina wan tekoşînê bike. Ew guherînkariyê bi wateya girtinê pêş ya siyaseteke cidî ya Amerîkayê ye li hemberî dosiyeyên Kureya Bakur û Îranê. Niha egera rûniştina serokê Amerîka û Kureya Bakur heye, lê li derheq Rojhilata Navîn min jêve ye ku Trump bawerî bi vê heye ku ji bona ku Amerîka di vê navberê de hejmoniya xwe biparêze, pêwîst e ku ecîndayên Îranê ji nav bibe. Lê ewên ku berpirsê yekem bûn di Wezareta Derve û Ewlehiya Neteweyî

ya Amerîkayê de, digel nasîna rastîn ya Trump li dijî terorê û tevdiakariyên Îranê di Rojhilata Navîn de, hev nedigirtin.

Ew karakterên ku Trump diyarî kirine, baştir rejîma Îranê nas dikin, bo mînak Trump li ser vê baweriyê ye ku şaşiya mezin ku Obama kiriye, lihevkerina digel Îranê ye, û Îran mezintirîn piştevanê terorîzmê ye di cîhanê de. Hevdayê vê bîrkirinê jî, Boltonê destnîşankirî ji bo şevirmendiya Asayîşa Neteweyî ya Amerîkayê, bawerîya wî ya neguher ew e ku Amerîka û Îsraîl tenê bi bordûmankirinê dikarin rêgiriye ji Îraneke navikî bikin. Herwisa Mike Pompeo`yê destnîşankirî bo Wezîrê Derve yê Amerîkayê jî li ser vê baweriyê ye ku ew bi kêmtir ji 2 hezar êrişên balafiran dikarin pirograma navikî ya Îranê ji nav bibin.

Bi hûrbûna ji van boçûnan derdikeve ku Trump dixwaze ku tîmeke yekdest di kabîneya xwe de pêk bîne, ku li ser yek baweriyê, û yek ecîndayê di hemberî Rojhilata Navîn bitaybetî Îranê, ku wekî çavkaniya terorîzmê tê naskirin, bikevin kar.

**Pirs: Ku wisa bû mebest ji guherîna wan, zêdetir sekinandina Îranê ye?**

**Bersiv:** Dema ku "Mike Pompeo" lêpirsyarê "CIA" bû, karê wî yê herî xûya guherînkariyê bû li beşa dosiyeya Îranê, di destpêka Tîrmeh a 2017`an

**Şerîf Hejarî: Hin ji hêzên kurdî, bûne kopalê destê Îranê û fermanên wê cîbicî dikin.**



de. Herwisa "Michael D'Andrea" kire lêpirsyarê "CIA" bo dosiyeya Îranê. Bi bawera min heya niha şûna destê wî di tewerên navxwe yên Îranê de berhemdar bûye.

Mixabin ku heya niha lêkolên Kurd di xwendina bo kesayetiyên dosiyeya (Îran, Îraq, Tirkîye û Sûriye) ya dezgeha "CIA" de, lawaz in, û di medyayên Kurdistanê de jî girîngî pê nahê dayîn. Michael D'Andrea roleke mezin di destbiserkirina tawanbarên 11`ê Îlonê, û herwisa li Pakistan û Yemen û gellek welatên Rojhilata Navîn de lîstiyê, bi taybetî rola diyar hebûye di kuştina terorîst Îmad Muxniye, serkirdeyê bibandor yê Hizbullahê di Demişqa paytexta Sûriyê de.

Niha "Michael D'Andrea" naznavê Ayetullah "Michael D'Andrea" li ser hatiye danîn. Wisa nabînim ku ew hemû guherînkariyê her li xwe re hatibin kirin. Min pê waye tunekirina ecîndayên rejîma terorîst a Îranê di holê de ye. Bi Kurtî Trump bi van guherînkariyên dixwaze ku bêje Îran û hemû cîhanê, ku di hemû demeke deshilatdariyê de, vebijêrka leşkerî li dijî Îranê vekirî ye!

**Pirs: Bi baldan bi nakokiyên Îran û Ewropayê li ser rêkvevtina li ser**

**Bercamê pêşniyara çi sînaryoyan bo piştî van guherînan dikî?.**

**Bersiv:** Diyar e ku Amerîka heya radeyekê rêz ji welatên Ewropî yên hevpeymanê xwe derheq pirsên Rojhilata Navîn digre. Bo mînak derheq lêdana Îraqê, Amerîkayê heya sînorekê girîngî bi boçûna dewletên wekî Firansaya serdema Jacques René Chirac (Jak Şîrak) û hinek ji hevpeymanên xwe ên Ewropî da, lê piştê serbarê cuda bîrkirina wan, rasterast lêdana Îraqê ragehand.

Sê eger li ber dest de hene ku tramp bigre pêşiya xwe, di derbarê Bercamê de:

1-Pêdeçûna bingehîn bi ser rêkvevtinê ji aliyê Amerîkayê ve.  
2-Hilweşandina yek alî ya rêkvevtinê ji aliyê Amerîkayê ve. Di vê derheqê Wezîrê Derve li ser vê baweriyê ye ku di destpêka meha Gulan a îsal de, Trump ji lihevkerina etomî vedikêşe, jiber ku soz daye Îsraîlê ku rêkvevtineke wisa qebûl nake.  
3-Lêdana binkeyên etomî ên Îranê ji aliyê Amerîka û Îsraîlê ve. Pêştir Bolton di gotareke xwe ya "New York Times"ê de belav kiribû û nivîsandibû ku "tenê êrişê leşkerî çareserîya

bernameya navîkî ya Îranê dike. “

Heta hekî rewşa rêkvevîtinê bi vî awayê niha jî bimîne, Îranê qazanceke wisa tê de nekiriye, jiber ku Amerîka di piraktîkê de tu hisabekê bo vê rêkvevîtinameyê nake, û ne tenê lêni-hêrîna Amerîkayê li hemberî rejîma Îranê nehatiye guhertin, belku tundtir jî bûye. Ger em lê hûr bin, di şêş mehên borî de, diravê Îranê xiraptirîn û erzantirîn nirx di dîroka xwe de tomar kiriye, ku ew jî vê yekê nîşan dide, ku di navenda Piraktîka siyasî-stratejî ya Amerîkayê de, rejîma Îranê di lîsta reş de ye. Destpêkê vê rejîmê di warê aborî û diravî de diherifînin, û piştê encamên wê ên din jî wê hebin.

**Pirs: Di vê navberê de gefek bi navê Rûsiyê bo ser berjewendiyê Rojava dikare çi bandorekê li ser yekhelwestiya Amerîka û Ewropayê, li ser vê meselê danê?**

**Bersiv:** Gefa Rûsiyê cidî ye, û mîcidtir jî dibe, heta ku metirsiya Rûsiyê li ser berjewendiyên Rojava zêdetir be, dewletên Rojava jî yekgirtîr dibin. Bo mînak di van dawiyane de kuştina ajanekê û keça wê ji aliyê Rûsiyê ve, dijkiryareke zêde hebû, û Bîrîtaniya û YE û Amerîkayê hejmarek dîplomotkarên Rûsiyê derxistin.

Rûsiye mezinhezêke cîhanî ye, nîfûza dîrokî heye, jeopolîtîkek bibandor heye, lê gelo welatên Rojava û NATO`yê lê digerin ku Îran bibe beşeke cîbicîkirina ecindayên Rûsiyê, û Esed jî karekê bike ku Rûsiye bi dilê xwe di behra Naverast de bilîze? Bê guman lê nagerin, û aboriya welatên Rojavayî û jeopolîtîka wan, û nîfûz, hevpeyman, û teknolojiya wan wisa dike ku Rûsiye heta ser nekare Sûriyê û Îranê di destê dîktatoran de bihêle.

Lê ew rikeberî demê dixwaze, û di şev û rojekê de bi dawî nabe! Lê heya ku Îran û Esed hevpeymanê serekî ê Rûsiyê bin, Rojava li dijî wan yekgirtîr dibe.

Niha rikeberî di navbera Amerîka û Rûsiyê de ew e ku, Amerîka wekî mezinhezê cîhanê nîfûz bi ser hemû aliyên cîhanê de hebe, Rûsiye jî tenê dixwaze ku li ser cîranan û derdorê de hejmoniya xwe biselîmîne, lewra di rastî de nîfûza Amerîkayê, wekî mezinhezêtirînê cîhanê, û hejmoniya Rûsiyê wekî mezinhezêkê di cîhanê de cudahiya di navbera wan de zor e.

Niha wekî serdema şerê sar nîne ku şer cîhan dagirtibe, li Angola heya Kûba û jî vir ve jî heya Rojhilata

Navîn dirêj bibe, yan di navbera du îdeolojiyên lîberalîzm û komonîzmê de be, belku Rûsiyê şanaseke îdeolojî nemaye, û şer nêzî sînorên Rûsiyê bûye. Her li Sûriyê ve bo Îran û heya digihîje Gurcistan û Okraynê. Ku wisa bû em nikarin çavnihêrê vê bin ku Rûsiye wekî mezinhezêkê bi hêsanî xwe bide dest. Lê di stratejiyê de Rûsiyê şiyana hêla rejîmên dîktator wekî Sûriye û Îranê nîne!

**Pirs: Bi berçavgirtina hemû wan sînyaroyan, çiqas dikarin paşekêşê bi stratejiya Îranê di navçeyê de bikin, û di encam de guherîna rejîmê li pey xwe hebe?**

**Bersiv:** Qonaxa rejîma Îranê ber bi paşekêşê ye. Niha ecindayên derekî rû li şikestê ne, û di stratejiyê de jî şer dixin nava Îranê de, û hîloşandina vê rejîmê lê dikeve.

**Pirs: Serbarê serdestiya Îranê di Sûriyê de niha bas ji paşekêşana Amerîka li Sûriyê û cihgirtina Fransayê baseke germ ya çavdêrên siyasî ye, xwendina we bo vê yekê çi ye?**

**Bersiv:** Ez ne bawer im ku bi awayekî radîkal hemû hêz û şevirmendên Amerîkayê ji Sûriyê bêne vekîşandin, jiber ku taybetmendiya împatoriya Amerîkayî cudatir e ji taybetmendiya împatoriya din, lewra dema ku çû nava her xakekê, zehmet e ku bi tewahî jê vekîşe, lê ew cihgirtin çend biyavên wê hene.

-Biyavê dîrokî: Min jêve ye ku hinek bûyerên dîrokî hene, ku di demên cuda yan di cihên cuda de dubare dibin, û li gora encama piraktîzeyê rêkvevîtinameya Sayks-Pîko-Sazanov, Fransayê bûye xwediye wilayeta şam (Sûriye û Lubnan îro). Taybetmendiya dagîrkeriya Fransayê (kultûrî) bû, wate hewl dida ku kultur û zimanê Fransî bi ser van gelên ku tene dagîrkin, bê belavkirin, lewra Firansayê kesên xwe hene, di nava Sûriyê de, eva jî dikare wisa be ku Firansa zêdetir ji rûşa civakî û siyasî ya di nav Sûriyê tê bigihîje, heya Amerîka.

-Amerîka dixwaze ku di piraktîkê de biselîmîne ku hevalbendên wê jî dike şîrîk di zêdexwaziya xwe de, bi vî awayî rol dide hevpeymanên xwe yên Ewropî, û eva jî parvekirina hêzê ye.

-Dikare ku Amerîka ji diya xwe (împatoriya Bîrîtanyayê) ezmûn wergerîne, ku carna hejmoniyên wê bikeve ber zêdexwaziya Rûsiyê, lewra wekî Bîrîtanyayê, ew çiyê ku



kêşe û rikeberî li ser heye, bi hevpeymanê xwe teji dike.

-Sedemek din ew e ku nexwaze dilê Tirkîyê hevpeymanê stratejiya xwe di pêxema PYD`ê de bêşîne, belku bi leyîzeke siyasîyane xwe ji vê leyîzê dîr dixe, yan renga jî Amerîka bixwaze ku şewazeke nû bona rûbirûbûna Rûsiyê di Sûriyê de bi kar bîne.

**Pirs: Di vê navberê de Tirkîye çi lê têt? Gelo zêdexwaziyên wê her wa domdar dibin?**

**Bersiv:** Erdoxan siyasîyeke fêlbaz e, û bi başî ji girîngiya jeopolîtîkiya Tirkîyê dizane, niha Erdoxan dizane ku çawa bo berjewendiya Tirkan hem dîn bi kar bîne, û hem jî rikeberiya di navbera Rûsiyê û Amerîka bona pêkana berjewendiyên xwe bi kar bîne. Helbet serkevtinên Erdoxan beşek girêdayî vê rewta Kurdî ye, ku dijberiya Erdoxan dike, lê xwediye stratejiyeke zelal ya neteweyî ya Kurdî nîne!

Berjewendiyên Tirkîyê wekî hêzeke NATO`yê û ya Firansayê jî wekî hêzeke din ya NATO`yê cuda, û heya qasekî jî ecindayên wan jî nakok in di nava xaka Sûriyê de. Lewra Firansa ji her hêzeke din ya navdewletî zêdetir girîngiyê dide pîrsa Kurd. Di vê yekê de, bicîhanîbûna pîrsa Kurd ji aliyê Qasimlo ve, roleke mezin di rakêşana Firansayê bo aliyê pîrsa Kurd hebûye, lê yek stratîjî Tirkîyeya Erdoxanê îxwanî û Firansaya Rojavayî li dewra yek kom dike, ew jî dijberiya hejmoniya Îranê û rûxandina Esed û kêmkirina hejmoniya Rûsiyê di xaka Sûriyê de ye.

**Pirs: Bi giştî ew guherînkariya çiqas di berjewendiya Kurd de dibin, yan hûn bandorên wê li ser pîrsa Kurd çawa dibînin?**

**Bersiv:** Min pê waye ku hekî em bêjin rewş jî bo Kurd baş nabe, û derfet nahê pêş, eva rastbêj û rasteqîne nîne. Kurd bixwe derfetan wekî

hewce bi kar nahînin. Beşek ji hêzên Kurdî bûne dardestê Îranê, û bi tu şermekê fermanên Îranê cîbicî dikin. Herçend ku Îran dixwaze gemaroya aborî bixe ser beşên Kurdistanê, û tevdanîkarî û terorê di başûr de bidomîne, lê ew kar tenê pêkutan û xwe hilkutana dawîya temenê wê ye, û li stratejiyê de rûxana Îranê tê wateya tunebûna rejîma herî tirsnak ya dijî Kurd, û heliyana bîra teng ya tewaw ya wan qelembi dest ên çavbîr e, ku niha di başûra Kurdistanê wekî model û bi hevkarîkirina rasterast ya konsola Îranê di nava takê Kurd de belav dikin. Ez rûxana rejîma Îranê hetmî dizanim, ku ew yek jî sedî sed di berjewendiya Kurd de ye, û wan hizbên ku xwe pê ve jî girtine, di paşekêşê û aşbetalê de ne, ku ew yek jî kêmekê bêhnfirehiyê dixwaze.

**Pirs: Kurd yan tevgera siyasî ya Kurd çawa dikare mifahê ji vê rewşê wergire ku pêk hatiye?**

**Bersiv:** Tu dibe bixwe azadiyê bixwazî, ne eva ku tu bindestî û biratiya gelan û pêşkêşkirina Kerkûkê bi dagîrkeran bixwazî, û li cem hêzên opozîsyonê jî bîra neteweyî bi eyb û şerm bizanî, û bêjî ku modêla wê nemaye, lê piştê bêjî “Bo Amerîka nahê bergiriyê ji me bike, û azadiyê bibexşe me”!

Çareseriya Pîrsa kurd tenê û tenê yekrêzî ye, lê hekî yekrêzî jî sernegirt, dibe ku hêzên neteweyî ên her çar perçeyan, mîsaqeke şerêfê bi nihênî îmza bikin, û li ser çend xalan bo parastina berjewendiyên neteweyî, û egeran û bikaranîna derfetan li hev bikin, û netirsane li dema nêzîkbûna derfetan de bi bê guhdana bi ragehandinan, bi xafilandin, çavbîran û alavên dest dagîrkeran di vê parçeyê de ku derfet jê wan re hatiye pêş tune bikin.!

Lê hekî dubendî her hebe, yekrêzî pêk nehê, û beşek ji hêzan her bawerî pê nehê kirin, û di derfetan de hemû deskevteke

## Nerîna Lîderan



Baydemir:

“Em dixwazin ligel partiyên Kurdî tifaqê bikin”.




Sezai Temell:

“Ji bo hesabê hilbijartinê operasyon dan destpêkirin”.



Elcobeyr:

“Me pêşniyar kir, da ku hêzên hevalbendîya Îslamî bo Sûriyê bêne şandin”.



Xamineyî:

“Amerîka û Firansa û Birîtanya cinayetkar in”.

## Şîrîn Îbadî: Reform di rejîma Îranê de bê encam e

**X**elatwergêra Aştiyê a “Nobel”ê Xidibêje ku, ji bo xelkê Îranê rohn bûye ku nizama siyasî a Îranê reform tê de nayê kirin.

“Şîrîn Îbadî” di gotûbêja digel medyaya Înternêti a “Bloomberge” de gotiye ku: Xelkê Îranê li pey “guherîna nizama siyasî” û “yasaya bingehî” a wî welatî, û danîna yasayêke bingehîn ya “secular” li gora carnameya cihanî ya mafê mirovan” in.

“Şîrîn Îbadî” çalakvana mafê mirovan, herwisa daye zanîn ku tu demî ser vê baweriyê nebûye ku, “Hesen Rohanî” referomxaz be, û herwisa navbirî îşare bi nerazîbûnên xelkê yên di meha Befranbara sala derbazbûyî a Îranê de kir, û derheqê nebûna rêberêke di nav nerazîbûnan de jî da zanîn ku, di rewta xebatê de rêber derdikevin, dema ku hilbijartinên serbest û azad di Îranê de bîn encamdan, wê demê wê rêber jî derkevin.

Di heyamên borî de jî, navbirî digel hejmarek ji çalakvanên siyasî û medenî yên Îranê di daxuyaniyekê de, daxwaza lidarxistina giştîpîrsiyê di Îranê de û herwisa diyarîkirina curek ji hikûmetê ji bo wî welatî, û guherîna aştiyane a nizama siyasî ya Îranê kiribûn.

Ew wergêra xelata aştiyê ya “Nobel”ê di heyamên borî de, di gotûbêja digel “Euronews”ê de jî ragehandibû ku: Serkomarê rejîma Îranê berpirsyarê piraniya wan bûyeran e, ku di Îranê de diqewimin.



## Thomas Friedman: Xwe ji bo şerê di navbera Îran û Îsra`îlê de amade bikin

**“Thomas Friedman” yek ji rojnamevanê naskirî yê Amerîkayê, di rapora rojnameya “New York Times”ê de belav kiriye ku, şerekî din li Sûriyê di navbera rejîma Îran û Îsra`îlê de wê çê bibe.**

Thomas Friedman yek ji rojnamevanê naskirî yê Amerîkayê, di raporeke rojnameya “New York Times”ê de bas ji vê kiriye ku, heyanî niha rejîma Îran û Îsra`îlê bi bêdengî şer kirine, lê ji wir şûnda rejîma Îran û Îsra`îlê, di Sûriyê de rasterast wê şer bikin.

Navbirî di vê raporê de nivîsandiye: Hekî we pêştir eva bihîstibe, min ragirin, Sûriye wê biteqe, dizanim ku eva we bihîstiyê, lê wê carê bi rastî Sûriye wê biteqe.

Thomas Friedman di vê raporê de nivîsiye ku: “Piştî êrişê Amerîkayê û hevalbendan bo ser Sûriyê, hevdem egera şerê di navbera rejîma Îran û Îsra`îlê jî, zêde bûye.

Navbirî di vê derheqê de jî axivî, û got ku, yekem şerê di navbera Îsra`îl û rejîma Îranê de, di 10`ê Şibatê de çê bû, û ev jî di heyamekê de bû ku balafireke bê pilot ya rejîma Îranê piştî evê ku çû bû nav axa Îsa`îlê, ji aliyê artêşa Îsra`îlê ve kevtibû xwarê, û piştî lêkolînên derheqê parçên wê balafira bê pilot ya Îranê ji aliyê dezgeha zanyarî a Îsra`îlê ve fermanê bi navê “Runîn Mênalls” gotûbêjê artêşa Îsra`îlê ve hate eşkerekirin, ku ev balafira bê pilot ya rejîma Îranê kelûpelên teqînê hilgirtine, û erk û wezîfeya bombebarankirinê jî hebûye.

Piştî çendî caran êrişên artêşa Îsra`îlê bo ser binke û hêzên rejîma Îranê di Sûriyê de, “Elîekber Wilayetî” şevirmendê Xamineyî bi fermî ragehand ku ew wan tawanên bê bersiv nahêlin.

Hevdem berpirsekî Îsra`îlê jî bi fermî ragehand ku, ewê êrişî ser binesaziyên leşkerî yên rejîma Îranê bikin.



## »»»» Doma manşê

“Niha jî tevî daxistina ser ji nû ya sînorên kolberiyê, yasayên gumrikî jî bi zirara kesên kalayan tînin û dibin guheriyê, û bi vî awayî carek din jiyana vî xelkê xistine metirsiyê de. Rastiyek ku ew hinda din jî kerb û bêkariya xelkê van navçeyan lê ketiye, û eva ye ku karbidest tu piroje û bernameyeke aborî bo jiyana û birêveçûna vî xelkî tunînin, ku kolberî, û hînan û firotina alavan li wan qedexe kirine.

Navenda Hevkariya Hizbên Kurdistanê Îranê girevgirtin û nerazînişandana xelkê bajarên sînorî, wekî hereketeke medenî ya hilgirê daxwaziyên rewşa mirovî dizane, û bi tewahî piştewaniya wan dike.

Nîşandana sivka betall û deng bilindkirina li dijî wan hemû tawan û û qedexeyan ku rejîma Îranê bona tunekirina çavkaniya jiyana zehmetkêştirîn beşên xelkê bi rê ve dibe, mafê herî destpêkî yê vî xelkê ye”.



Her di vê biyavê de xwendekarên zankoya Peyama Nûr ya Merîwanê jî bi weşandina daxuyaniyekê piştgiriya xwe ji girevgirtiyên Kurdistanê nîşan dane, û ragehandine:

“Em jî wekî çîna xwendekar ya Merîwanê, piştgiriya xwe ji girevgirtiyên radigehînin, û ji xelkê Kurdistanê daxwaz dikin, ku:

Bi daxistina bazaran li hemû bajarên, piştewaniyê ji girevgirtiyên bazara Merîwan û Bane û Ciwanroyê bikin.

Herwisa dibe ku çînen cuda yê din ên civakê (karsaz û xwendekar û ... hwd) bo piştewaniya ji girevê, helwesta xwe eşkere bikin. Xelkê nerazî heya gihîştina bi daxwazên xwe, wê berdewam bin li ser girevê”.

## »»»» Doma R:6

bîbexşin dagirkeran, eva dehan derfetên din jî bêne pêş, wê ji dest bidin. Belkû dibe wek şoreşa rizgarîxwaziya gelên din bi xafilandun, mîkrobên navxwe ceza bikin, hekî ne, wê dîrokê hertim dubare bikin!.

**Pird: Kurdê Rojhilat û partiyên siyasî dibe çi siyasetekê berçav bigrin, ku di vê derfetê de bi qazanca wan bişkê?**

**Bersiv:** Herçend rewşa opozisyona Kurdî di Rojhilat li Herêma Kurdistanê de li jêr gefa tirsnaq ya terorkirinê de ye, lê sedî sed min pê waye ku pêşeroja wan ronahî ye.

Ez dixwazim ku bi eşkere bêjim, min hêviyê wisa bi beşek hêzên Rojhilata Kurdistanê nine.

Jiber ku serbixwe nînin, ku ew yek gelekî tirsnaq e bo niha û pêşeroja Rojhilata Kurdistanê. jiber ku hertim ji riyana wna ve ye ku aliyê din dikarin destêwerdanê di nava karûbarên vî parçeyê de bikin. Heta dagirker jî fayde lê dibînin!

Min jê ve ye ku PDKÎ wekî serekî-tirîn hêza Rojhilat, dibe ku vî yekê yekalî bike, ku zêdetir ji asta hewce pêşmerge hebe, jiber ku em di Rojhilata Navîn de dijîn, û em Kurd in jî!!.

Bi kurtî PDKÎ dibe ku li ser du bingeh-



han kar bike:

-Di awayekî eşkere û di warê ragehandinê de, mîsaqê neteweyî digel hinek ji hêzên Rojhilat îmze bike bo derfetan, lê bi hûrî bizane ku encamên vî mîsaqê çi jê şînin dibe.

-Di biyavê nihênî de jî, tewahiya egeran û pêşatan, û derfetan di organa herî bilind de, bi nivîskî kom bike, û wisa danê ku mîsaqê yekem digel hizbên Rojhilat ser nagre, belku PDKÎ bi xwe kar li ser bike, bona vî ku hekî vebijêrka yekem ser negirt, eva PDKÎ bi xwe paketa duyem di ber dest de be, û piraktîze bike.

**Dawî gotina we?**

**Bersiv:** Girînge PDKÎ nûneratîyên xwe bi taybetî li Amerîka, Kanada, û Bîrîtanya, bihêz bike, û di asta navçeyî de jî, girîngiyê bide pêwendîyan, li gora serkevtina hêzên qonaxê û jeopolîtîkê! rewşê berçav bigre. Stratejiya faşîstî ya mezhebî-neteweyî ya rejîma Îranê, bona şûştina bîra neteweyî ya takên Kurd e, û heta rejîma Îranê bi xwe hinek ji qelebîdestên Başûra Kurdistanê jî bi kar tîne, gelo di asta vî pilana nû de, bizava neteweyî dibe ku kîjan rêkaran bigre pêş?.

Çawa bîra neteweyî ya Kurdî di warê teorî de, li gora qonaxê dadirêje, û bi piraktîka şoreşgerane jî xwe diselimîne!?



## Lêborîna Navneteweyî: Îran duyem welat e di biyavê îdaman de

**L**êborîna Navneteweyî rapora xwe ya salane derbarê îdaman de belav kir, û Îran wekî duyem welat di warê serjimêriya zêde ya îdaman de, da nasandin.

Di vê raporê de hatiye ku 142 welatan cezaya îdamê ji nav yasayên xwe rakirine, lê di sala borî de 23 welatan cezaya îdamê di welatên xwe de cîbicî kirine.

Li ser bingeha rapora Saziya Lêborîna Navneteweyî di sala borî de aliyê kêrhatî 507 kes di Îranê de hatine îdamkirin, ku zêdetir ji nîva wan îdaman e

ku di asta cîhan de hatine cîbicîkirin. Ew rêje li gora sala 2016'an %11 kêrhatî kiriye, lê li çav welatên din heta niha jî ji hemiyana zêdetir e.

Piştî Îranê, Erebi-stan bi 146 îdaman û Îraq û Pakistan bi 125 û 60 îdaman di sala 2017'an de zêdetirîn hejmarê îdaman bûye.



## Tendirustiya Zeyneb Celaliyan piştî berdeambûna li ser girevê ne baş e

**A**jansa Kurdpa: Rewşa girtî-ayeke Kurd di girtîgeha bajarê Xoyê piştî girevê ne baş hatiye ragehandin.

Li gora nûçeya gihîştî Ajansa Nûçegihanîya Kurdpayê, Zeyneb Celaliyan girtîya siyasî a Kurd di girtîgeha bajarê Xoyê pê daniye nava 11.mîn sala di girtîgehê de, û bi sedema zêdetir ji yek salî gireva derzî dermanan û pêrengihîştina pizîşkî di rewşeke ne baş ya girtîna de derbaz dike.

Li gora çavkaniyê agehda di heya-ma sala borî de, berpirsên girtîgehê bi awayê berdeambûna digel çareseriyê pizîşkî ya vê girtîya siyasî a Kurd li derveyî girtîgehê dijberî kirine.

Ew çavkanî di dirêjîyê de dibêje: Serbarê pêşniyara malbata vê girtîya siyasî ya Kurd bona bidawînanîna bi girevê, Zeyneb gireva xwe domandiye.

Vê çavkaniyê bas ji vê yekê jî kiriye ku: Ew girtîya siyasî ya Kurd bi giranî nexweş e, û hewcehiya wê bi

çavdêriya taybetî ya pisporî li derveyî girtîgehê heye.

Pêştir jî Zeyneb Celaliyan di girtîgeha Kirmaşanê tûşî nexweşiyê "Naxunek" bibû, û ew nexweşî bû sedema lawazbûna çavên navbirî, heya niha jî tu hewlek bo çareseriyê wê nehatiye dan.

Li gora rapora Rêkxirawa Lêborîna Navneteweyî, berpirsên girtîgehê û Dezgeha Dadweriyê serbarê rewşa nebaş ya tendirustiya Zeyneb Celaliyan girtîya siyasî ya mehkûm bi

girtîna heta-hetayî digel çareseriyê pizîşkî ya navbirî li derveyî girtîgehê dijayetî kirine.

Rêkxirawa Lêborîna Navneteweyî amadenebûn bo çareseriyê pizîşkî bo Zeyneb Celaliyan wekî cezayê tund û wergirtîna îfadeya bîzorî ji navbirî bi nav kirine.

Zeyneb Celaliyan bi tawana endametî û hevkarîya digel yek ji partiyên Kurdî ên opozisyona hikûmeta Îranê wekî "Miharib" hatiye naskirin.

## Meşên nerazîbûnên di destpêka sala nû di Îranê de

**D**i destpêka sala nû de, şîpeleke nerazîbûnan li nav texên curbicur yê civakê, di seranserê Îranê de dest pê kiriye.

Di piraniya bajarên Îranê de, kedkar, karmend û cotkar di destpêka sala 1397'an de, bi bi girevgirtîna, û xwenîşandanan, ji ber wernegirtîna heqdestên çendîn mehan, û pirs-girêkên aborî û herwiha nîşandana nerazîbûnan ji ber daxistina Karxaneyên pişeyî û betalbûna hezaran kesî, û herwisa pirs-girêka kêrhatî aviyê ji bo cotyaran, şîpeleke nû a nerazîbûnan di seranserê Îranê de dest pê kirine, ku heya niha jî dom heye. Ev tex û çînen ku dest avêtine girevê, û xwenîşandanan, nerazîbûna xwe ji ber xemsariyên berpirsên rejîmê, û xemsariya wan berpirsan ji jiyana dahata xelkê bûye.

Herwisa bera serekî a nerazîbûnan ber bi rejîma Îranê ne, û daxwaza çare-

seriya pirs-girêkên xwe dikin.

Kedkarên derxistî yê bajarê Ehwezê, Kedkarên agir vemirandinê yê Petrolê û gaza Eseloyê, Kedkarên Karxaneya Rûnê Nebatî ê Xunçe, û Kedkarên şaredariya Hemîdiyê a bajarê Mazenderanê, Kedkarên Mitalojî a Pûdra Qezwînê, Nesaciya Xamênê ya di parêzgeha Azerbaycana Rojhilat de, Karxaneya Pirofil a Sawê, û...hwd berdeambûna xwe nîşan dane û didin.

Kedkarên Karxaneya Polad a Urmîyê, ku di sala 1396'an de, derheqê wernegirtîna heqdestên çend mehan xwe nerazîbûna xwe nîşan dabûn, piştî bidawîhatina rojên bêhnvedana Newrozê dîsan li pêşberî parêzgeriya Urmîyê kom bûn, û bi nerazîbûnên xwe domandin.

Herwisa kasibkarên bajarên sînorî yê weke Seqiz, Bane, Merîwan û Ciwanroyê, ji ber daxistina sînoran, bi daxistina dukanên xwe dest bi girevê kirin.

Herwisa di parêzgeha Kirmaşanê de jî, terşdarên bajarê Serpola Zehawê, ku bi sebeba erdhejê beşek zêde ji terşên wan jinav çûbûn, û rejîmê jî soz dabû ku xesarê bide wan, lê rejîmê piştî derbazbûna zêdeyî 5 mehan bi ser erdhejê, heyani niha jî xesara terşên jinavçûyî nedaye, û kesên terşdar jî dest bi xwenîşandanan nerazîbûnên kirine.

Hêjayî basê ye ku, ew xwenîşandanan pişeyî, û ên sertaserî, bi awayê giştî li hemberî siyasetên rejîma Îranê de ne.

Mînakê herî girîng xwenîşandanan bajarê Ehwezê ne, ku bi armanca berevanîkirin ji mafên neteweyî, ew meş bi rê ve birin.




## Seydayê Cegerxwîn û dîrok

**S**eydayê Cegerxwîn ne tenê helbestvan bû, lê wî guhdaneke mezin bi warê dîrokê jî dikir. Di piraniya berhem û dîwanên wî de, behsa dîroka Kurdistanê tê kirin, herwiha navê kesayetiyan dîrokî yên gelê Kurd tînin bibîranîn.

Li ser aliyê dîrokî di helbestên Cegerxwîn de pirtûkeke nû hate çapkirin û belavkirin. Pirtûka nû bi awayekî berfireh li ser mijara dîrokê li ba Seydayê Cegerxwîn disekine û zanyariyan nû pêşkêş dike.

Siyasetmedar û qanûnzanê Romayî yê navdar Cicero ku berî zayîna jiyayê li ser dîrokê wiha dibêje: “Her kesê dîrokê nexwîne, dê her û her mîna zarokekî biçûk bimîne.” Çimkî kesê dîrokê bi hûrbîna û kûrbîna nexwîne, dê çewtî û xeletiyên wê dubare bike û dema xwe ya niha û siberoja xwe jî wînda bike. Lewra jî derketina her berhemeke li ser dîrokê, nexasim li ba kesekî nola Seydayê Cegerxwîn karekî erênî ye.



Di vî warî de, nivîskarê Kurd Îbrahîm Îbrahîm ku sala 1971ê li bajarê Hesekê yê Rojavayê Kurdistanê ji dayik bûye, pirtûka xwe ya nû bi navê “Rengvedana Dîroka Kurdî di Helbestên Cegerxwîn De” belav kir.

Di destpêka kitêbê de, nivîskar Îbrahîm Îbrahîm ku sala 1997an Beşê Dîrokê li Zanîngeha Şamê qedandiye, li ser sedema çêkirina kitêbê û hilbijartina aliyê dîrokî li ba Seydayê Cegerxwîn wiha dibêje:

“Cegerxwîn di dîroka wêje û edebiyata Kurdî ya modern de gewretirîn helbestvanê Kurd e. Bi berhemên xwe yên curbicur çanda Kurdî dewlemend kir. Herwiha xiznên pêzanîn û amajeyên dîrokî ku helbestên wî di bin perên xwe de vedîştartin. Lewra jî me ji bo lêkolînê, helbestên Cegerxwîn hilbijartin. Da em bibînin bê çawa dîroka Kurdan di wan berhemên de reng vedaye û pêwendiya navbera helbestên wî û dîroka Kurdan bi awayekî zelal û tekûz bidin xuyakirin.”

Lêkolîvan Îbrahîm Îbrahîm di pirtûka xwe ya “Rengvedana Dîroka Kurdî di Helbestên Cegerxwîn De” behsa jiyannameya Cegerxwîn a kesayeti, wêjeyî, nîrên civakî, aborî û siyasî yên ku beşdarî û bandora xwe di avakirina kesayeti û çanda wî de kirine, ligel pêwendiya di navbera helbest û dîrokê de dike. Herwiha li ber nakokiyên Kurdan di hemû qonaxên dîrokê de disekine û çend helbestên Cegerxwîn û bikaranîna bûyer û kesayetiyan dîrokî di van helbestan de şîrove dike.

Ev pirtûk ji 342 rûpelan pêk tê û li welatê Swêdê ji aliyê Weşanxaneya APECê ve hat çapkirin. Hoşeng Nîzar Nûh û Mihemed Zekî Mihemed ku wek Diljar Seyda tê naskirin lêhûrbûna pirtûkê kirine û bergê pirtûkê jî ji aliyê şewekarê Kurd Luqman Ehmed ve hatiye çêkirin.

## Fîlma kurdî “Rûmet” bo Festîvala “Cannes”ê hate hilbijartin

**Fîlma Loran Medya Productionsê “Rûmet” bi derhêneriya Kamiran Bêtasi, di Festîvala Cannesê de ji bo “Beşê Kurtefilman | Short Film Corner” hate hilbijartin.**

Çêkera Filmê Rûmet û yek ji berpirsiyarên Loran Medyayê Narîn Nadîrovayê li ser hilbijartina filmê Rûmet ji Rûdawê re wiha got: “Ji bo me serfiraziyeke mezin e ku filmê me, li vî festîvala mezin û navdar bi zîmanê kurdî were nîşandan. Emê hewl bidin bi du kesan li wir beşdar bin.” Hêjayê gotinê ye ku Festivala Cannesê 8ê Gulanê destpê dike û heta 19ê

Gulanê berdewam dike. Film wê di wan rojan de di beşê kurtefilman de û li ser internetê jî ji mêvanên festîvalê bi şifreyeke taybet were nîşandan.

Salihê Kevirbirî yê ku ew jî berpirsiyarê Loran Medyayê û menejerê veberhêneriya filmê Rûmet e bi van hevokan behsa naveroka filmê dike: “Filmê Rûmet behsa boyaxkarê pêlavan Findiyê 75 salî ku rengan ji hev dernaxe û zarokê bi navê Reşko dike ku li ber destê çayciyekî kar dike û di warê rengan de alîkariya Findiyê kal dike.”

Bûyer û mijara filmê rast e, li Zaxoyê derbas dibe û jiyana kesên heyî di filmê de hatiye nîşandan. Film jî deh xulekan pêk tê.



## Zimanê Kurdî

### Qursên Kurdî, A. Karabax

C) Ji aliyê peyvsaziyê ve hoker :

Wek me dîtibûn; piraniya wan peyv û qertafan, di hinek erkên xwe yên hevokî de dibin hoker.

Ev peyv û qertaf, li du beşên bingehîn parve dibin :

1. Hokerên xwerû(sade). 2. Hokerên hevedudanî(pêkhatî).

Qursên Kurdî, A. Karabax

41. Hokerên xwerû : Ev, ji yek bêjeyan pêk tên.

Mînak 521 : Ji hokerên xwerû çendek :

a. Ji nav û navdêran : Îro, duh, îşev, lez, nîvro, par, pêr, sibeh, zane.

b. Ji nav û rengdêran : Baş, bilind, kesk, mezin, rind, sax, xweş, zer.

c. Ji peyvên hokerî : Bêyî, hêdî, ku, na, par, pêr, zû.

ç. Ji yên çêkirî : Sibehê(sibeh+ê), baştir(baş+tir), zertirîn(zer+tirîn).

2. Hokerên hevedudanî : Ev herî kêr, ji du hêmanan pêk tên.

Mînak 522 : Bo pêkhatina hokerên hevedudanî, çend bikaranîn :

1. Ji yên bi bêjeyan çêdibin û bi hev ve tên nivîsandin :

Çavreş, çeperast, keskeşîn, rasterast, saxsax, serserî, xîzxîz, xurexur.

Hevok : a. Gulê xêz çeperast kişand. b. Azad, ji hespê de serserî kete erdê.

2. Ji yên bi ducarkirina bêjeyan çêdibin û cuda tên nivîsandin :

Hêdî hêdî, sar sar, teze teze, cot cot, deh deh, dilşikestî dilşikestî.

Hevok : a. Wan şîv sar sar xwarin. b. Zilam cot cot ketin hundirê malê.

3. Ji yên bi awayên tewandinê çêdibin :

Piştî nîvro, berê êvarê, sibehê zû, berî sê mehan.

Hevok : a. Dîlan piştî nîvro tê. b. Zavayê wan berî sê mehan li vir bû.

## Tiştonek



### A: Mahir Berwarî

- Tiştîkê min e tişt e, ne wî ber e ne pişt e

Bi desta nahêt girtin, dunya hemî jê mişt e

Roj hebit naderkevit, çiray hilkey dê revt

Gelek yê şehrezaye, bi gişt cîhan dikevt

Zaroka qet nevên ew, ji wan ve dê ketin hew

Lê bi rastî we nîne, dema bêtin xoş e xew

Ew nîsk e yan kuncî ye, sih e yan jî tarî ye. (\* Tarî) (38)

- Kalê pîr li civata Mîr. (\* Semawer)

Du golê reş û hişîn, li ser bejna şan û şîn. (\* Çav)

Têdîtin: Amadekar destkariya devoka metelokan nekiriye

**Xwendevanên hêja!**  
Hûn dikarin bersiva tiştonekan bi riya E-Maila Agiri2003@gmail.com ji me re bişînin



# Agirî

- ◆ Rojnameya "Agirî" di van malperên jêrên de bixwînin:
- ◆ [www.Kurdistanmedia.com](http://www.Kurdistanmedia.com)
- ◆ [www.Agirimedia.org](http://www.Agirimedia.org)
- ◆ [rojnamaagiri@gmail.com](mailto:rojnamaagiri@gmail.com)
- ◆ [www.facebook.com/Agirikirmanji](https://www.facebook.com/Agirikirmanji)

Navnîşana derveyî welat:

AFKB.P. 102- 75623 ParisCEDEX 13 –FRANCE

E - Mail: [Agiri2003@gmail.com](mailto:Agiri2003@gmail.com)

Hejmar (324)

## Wêneyên merasima bidawîhatina 229-mîn devreya destpêkî ya pêşmerge - çiyayên sînori ên Kurdisatnê

